

PRAVILNIK

O NAORUŽANJU I OPREMI PRIPADNIKA SUDSKE POLICIJE BOSNE I HERCEGOVINE

I. OPĆE ODREDBE

Član 1.

Predmet

Ovim Pravilnikom uređuje se vrsta naoružanja, opreme i posebne opreme, pripadnika Sudske policije Bosne i Hercegovine (u daljnjem tekstu: Sudska policija), pri obavljanju službene dužnosti.

II. NAORUŽANJE I OPREMA

Član 2.

Naoružanje

Naoružanje Sudske policije sastoji se od vatrenog oružja i sredstava prinude:

- a) Vatreno oružje je: pištolj, automatska puška i snajperska puška.
- b) Sredstva prinude su: fizička sila, gumena palica, raspršivači i razne vrste sprejeva za koje je izdat atest i sredstva za vezivanje.

Član 3.

Sredstva opreme

- (1) Sredstva opreme su: sredstva veze i motorna vozila.
- (2) Sredstva posebne opreme su: policijske kacige za glavu, pancirna košulja, džepna lampa, zaštitna maska i sredstva za pružanje prve pomoći.

Član 4.

Pravila za korištenje vatrenog oružja

- (1) Vatreno oružje koriste pripadnici Sudske policije prema pravilima koja su izdata na osnovu zakona.
- (2) Vatreno oružje sudski policajac može nositi samo na dužnosti.

Član 5.

Čuvanje vatrenog oružja

Vatreno oružje i municija čuvaju se na naročito osiguranom mjestu prema odredbama Pravilnika o smještaju i čuvanju oružja, vođenja evidencije o prometu oružja i municije i obrascima i sadržajima obrazaca za vođenje te evidencije ("Službeni list SR BiH", broj 31/78 i 28/90), vodeći računa da nisu dostupna civilnim licima.

Član 6.

Evidencija vatrenog oružja

O vatrenom naoružanju, municiji, opremi i posebnoj opremi u Sudskoj policiji vodi se posebna evidencija, u skladu s članom 5. ovog Pravilnika.

Član 7.

Održavanje vatrenog oružja

- (1) Vatreno oružje i municija, sredstva opreme i sredstva posebne opreme, kojom su zaduženi sudski policajci ili koja se nalazi na čuvanju u magacinu u Sudskoj policiji, moraju se održavati u ispravnom stanju.
- (2) Nestanak, uništenje ili oštećenje vatrenog oružja ili municije, opreme i posebne opreme, sudski policajac je dužan odmah prijaviti komandiru Sudske policije ili u njegovom odsustvu komandiru smjene.

Član 8.

Naknada štete

- (1) Sudski policajac koji namjerno ili iz krajnje nepažnje prouzrokuje nestanak, uništenje ili oštećenje vatrenog oružja, opreme ili posebne opreme, dužan je da nadoknadi pričinjenu štetu.
- (2) Postojanje i visinu štete utvrđuje komisija, u skladu sa odredbama o naknadi štete po Zakonu o radu u institucijama Bosne i Hercegovine ("Službeni glasnik BiH", broj 26/04).

Član 9.

Nošenje vatrenog oružja

- (1) Kod osiguranja zgrade Suda Bosne i Hercegovine (u daljnjem tekstu: Sud), pri sprovođenju pritvorenih ili osuđenih lica ili dovođenju u Sud svjedoka, sudski policajci su naoružani vatrenim oružjem i nose sredstva prinude.
- (2) Sudski policajac ne može dati vatreno oružje, municiju, opremu i posebnu opremu sa kojom je zadužen drugom pripadniku Sudske policije na korištenje niti civilnom licu.
- (3) Kada sudski policajac nije na dužnosti, vatreno oružje kojim je zadužen čuva kod kuće na za to sigurnom mjestu.
- (4) U slučaju prestanka radnog odnosa sudski policajac je dužan da preda u ispravnom stanju vatreno oružje, municiju, opremu i posebnu opremu kojom je zadužen.

Član 10.

Kontrola ispravnosti vatrenog naoružanja

- (1) Provjeravanje ispravnosti vatrenog naoružanja, opreme i posebne opreme vrši se prilikom redovnog pregleda, prilikom izvođenja vježbi i na smotri Sudske policije, koja se vrši najmanje jedanput u tri mjeseca, i kojima prisustvuje komandir.
- (2) Stručno-tehnički pregled ispravnosti vatrenog oružja, municije, opreme i posebne opreme vrši svake godine komisija koju formira ministar pravde na prijedlog komandira.

(3) O izvršenom stručno-tehničkom pregledu sastavlja se zapisnik i jedan njegov primjerak dostavlja se Ministarstvu pravde.

Član 11.

Opravke sredstava naoružanja

- (1) Opravke sredstava naoružanja mogu se vršiti samo u radionicama koje su za to registrovane.
- (2) Rashodovanje sredstava naoružanja i pojedinih dijelova opreme vrši se, na prijedlog komisije iz člana 10. stav (2) ovog Pravilnika, po propisima o materijalnom poslovanju organa uprave.

III. ZAVRŠNE ODREDBE

Član 12.

Stupanje na snagu

Ovaj Pravilnik stupa na snagu danom donošenja, a objavit će se u "Službenom glasniku BiH".